



Duznou Gag Lwnh

老鼠的自述

武鸣县仙湖镇中桥小学六(2)班 潘姿吉

Gou dwg duz nou ndeu. Gou ciengzseiz naemj aen seiqgyaiq neix dauqdaej dwg baenzlawz yiengh ne? Seiz iq gou roxnyinh aen seiqgyaiq neix rim nditrongh. Hoeng riengz nienzgeij ciemhciemh hung, gou cij fatyienh cungj nditrongh neix gaenbonj mbouj gvihaeuj bang nou raeuz. Baeznaengz gou mbeihung dwk byaij daengz gwnz gai bae seiz, gyoengqvunz mbouj dwg hemqswenj couhdwg gip rin gveng gvaqdaej, mbouj ndonjdeuz vaiq nex couh deng moeb dai lo.

“Duznou gvaq gai, bouxboux

hemq moeb.” Gou gaenq mingzbej gij eiqsei gawq vah neix lo. De dwg gangj gyoengqvunz haemz bang nou raeuz. Gou caen mbouj rox cojgoeng raeuz cungj guh le gijmaz, yinxhwnj gyoengqvunz yienghhaenx haemz raeuz. Cojgoeng raeuz lauhei q dwg caeg gwn gij haeuxgwn gyoengqvunz, lauhei q dwg haeb gvaq gij buh dijbauj gyoengqvunz, louz aen mingzdaeuz mbouj ndei. Hoeng gij saeh neix cungj dwg goenggeq raeuz guh, caeuq bannomj raeuz mbouj miz gvanhaeh ha!

Gou itcig siengj guh duz nou

cingqheiq, caencingz ndeu, caeuq vunz doxhuz youq. Hoeng vunz lij dwg lumj doenghbaez ityiengh yawj mbouj hwnj raeuz, haemz raeuz, miz mbangj vanzlij muengh cawzraeg raeuz. Neix doiq raeuz daiq mbouj goengbingz lo. Engq hawj gou gamjdaengz mbouj goengbingz dwg, gyoengqvunz gawqyienz yungh haujai swz daeuj ndaq raeuz, gae raeuz, lumjbaenz “da lumj noucim” “da lumj noucaeg” daengj. Naeuz raeuz “da lumj noucim” yawj mbouj gyae. Gizsaed lwgda yawj mbouj gyae dauq dwg vunzloih sou, sou raemj faex lailai daihdaih, buqvaih vanzging: Hwnj gunghcangj lailai daihdaih, baiz ok raemxuq, hawj raemxdah bienq ndaem, yinxhwnj vanzging yakrwix raixaix. Nanzdauh neix dwg yawj ndaej gyae

ma? Naeuz raeuz “da lumj noucaeg”, raeuz maj ndaej miz di yakyawj, hoeng bang nou raeuz boux caeuq boux gig caensim, mbouj lumj sou guhgyaj, baez miz leih’ik doxdawz, couh ok luenh.

Vunzloih, sou rox lwi? Youq yihyozgai, raeuz mboujdanh dwg doxgaiq yenzgiu bingh, youh dwg “boux sawqniemh” niemh yw, yihyozgyah youq gwn ndang raeuz sawqniemh gak cungj yw, vih vunzloih dwkgingz gij bingh guh ok gunghawj hungmbwk. Gou maqmuengh vunzloih gaijbienq gij daidu doiq raeuz, gou saenq, mbouj yungh geij nanz, raeuz couh bienqbaenz baengzyoux cei q ndei vunzloih.

(指导老师:潘文清)

Lwgnyez Myauz-cuz Yungzsuij Dang Mohdwz

融水苗娃模特秀

Haemh 7 nyied 20 hauh, youq Yungzsuij Myauzcuz Swciyen Ginhluzswngh Gvangcangz, boux mohdwz iq he cingq biujyienj. Haemh haenx, aen yienh neix gawjbanh lwgnyez mohdwz doxdax, ciuyinx baenz 40 lai boux lwgnyez mohdwz daeuj camgya, ndawde boux cei q iq ngamq ndaej 4 bi. Gyoengq boux daeuj camgya doxdax haenx doenggyaq daenj buhvaq minzcuz swheij canjok, caizyi biujyienj, byaij T daiz daengj, baijok gij ndei yawj gij akmaenh swheij.

(廖子渊)



goj lwgnyez

Duznou Caeuq Vumzvauz

Mbwn laep lo, dauqcawq cingxgaungau, mbouj miz saekdi sing vunz. Duznou ndoj youq ndaw cong, ngeng rwz dingdingq le, siujsim sisi iet gyaeuj okdaej yawjyawj, baihrog cong di ngaeuz vunz ndeu hix mboujmiz, hoeng, de youh suk gyaeuj dauqma. De mbouj ndaej mbouj siujsim, aenvih ngamq haemhlwenz, de okdaej caeg gwn, ca di deng vunz moeb dai.

De youh saeqsim dingq le youh dingq, yawj le youh yawj, baihrog caen mbouj miz gijmaz doenghdanh, de cij ndonj okdaej yaemzyaemz.

Duznou youq ndaw ranz cienq doh le, gijmaz gwn cix mbouj miz, de haeb faenz haeb heuj ndaq: “Gij vunz rwix neix, gijmaz hix mbouj louz hawj gou gwn, lij moeb gou!” De gwj ndaq gwj huj, couh roengzrengz gaet gouh haiz henz ndang, lij youq gwnz haiz ok haex ok nyough.

Duznou raih daengz laj yiemhroq, sawqmw, “bug” sing ndeu, miz yiengh doxgaiq ndaemndat ndeu ca di dub deng gyaeuj de. De hwk ndaej din cungj unq liux, lawq yaephe, cij fatyienh yienzlaiz dwg duz vumzvauz ndeu.

Duznou din baez daemh, singdaemq hongz: “Hwk dai gou lo, ca di dub deng gou!”

Vumzvauz naeuz: “Doiq mbouj hwnj, gou din in, haxbaenh, dough youq laj yiemhranz yietnaiq, mbouj siujsim doek roengzdaeuj lo.”

Duznou naeuz: “Mwngz vaiq ndoj hwnjdaeuj ba, mbouj nex, hawj vunz yawjraen couh dai lo.”

Vumzvauz naeuz: “Mbouj

老鼠和蝙蝠



youqgaenj, gou miz fwed, haxbaenh doek roengzdaeuj mbouj dengsieng, cij dwg din in.”

Cingq gangj dwk, dahsau iq ndeu byaij gvaqdaej lo. Duznou baez raen, couh gag buet deuz lo. Vumzvauz siengj deuz, hoeng, din baez cengi, in ndaej hemq “aiyo” sing ndeu, de bek fwed geij baez hix mbin mbouj ndaej hwnjdaeuj.

Dahsau yawjraen le, byaij gvaqdaej. Vumzvauz lau ndaej swenj “cece”. Dahsau maeuq roengzdaeuj yawjyawj, gangj: “Vumzvauz ha vumzvauz, mwngz ngoenznaengz bang dou gaeb nonhah, seizneix baenz gijmaz lo? Itdingh dwg dengsieng luba? Gou bang mwngz cat di yw ba.” Gangj dwk, song fwngz nep doiq fwed vumzvauz, dawz vumzvauz haeuj ranz bae.

Dahsau cazyawj raen din vumzvauz sieng le, couh ra yw daeuj siujsim daz gwnz din sieng de bae.

Dahsau menhmenh cuengq vumzvauz youq gwnz congheug bae, naeuz: “Baengzyoux hojlien,

mwngz couh ndeindei youq gizneix ciengxieng ba.” Gangj sat, gven dou deuz lo.

Banhwnz, duz nou youq rog gwn imq guhcaemz gaeuq le cij dauq, bakdou gven lo, de couh daj congheug ndonj haeuj ranz, youh fatheiq youq gwnz congheug ok nyough ok haex. De fwt raen vumzvauz, vumzvauz gaenq ndei haujai lo.

Duznou gamjdaengz gig geizgaiq, cam: “Sou vumzvauz caeuq dou duz nou maj ndaej doxlumj raixaix, sou mboujgvaq lai maj doiq fwed he, rox mbin ndwi, vihmaz gyoengqvunz doiq sou baenzneix ndei, youh dauq yaek moeb dou dai bae ne?”

Vumzvauz naeuz: “Dou caeuq sou mbouj doengz, dou cij gwn nonhah, coengzlaiz mbouj caeg doxgaiq vunz gwn, engq mbouj luenh haeb luenh gaet doxgaiq, bouxvunz lij dawz dou beij guh cungj fukheiq ndeu ne.”

Duznou dingq le, najmong raixaix, deuz yaemzyaemz lo.

(Ganh Sozvwenz/甘说文)